

**Kerajaan Pusat Komited Atasi Masalah PATI Di Sabah - Muhyiddin
Bernama
24 September , 2011**

PENAMPANG, 24 Sept (Bernama) -- Kerajaan Pusat komited untuk mencari jalan penyelesaian terbaik kepada isu pendatang tanpa izin (PATI) di Sabah meskipun ia merupakan satu masalah besar yang amat mencabar.

Timbalan Perdana Menteri Tan Sri Muhyiddin Yassin berkata kerajaan juga melihat perkara itu dengan serius dan mengambil tindakan yang sewajarnya.

"Saya fikir Perdana Menteri mengetahui perkara ini dan boleh memutuskannya. Di Sabah sudah ada Jawatankuasa Khas yang dibentuk dalam Barisan Nasional (BN) Sabah mengenai PATI yang dipengerusikan Tan Sri Joseph Pairin Kitingan (Timbalan Ketua Menteri).

"Saya sanggup melihat semua aspek...kita akan ambil kira setiap laporan jawatankuasa itu sama ada langkah ke depan memerlukan Suruhanjaya Siasatan Diraja (RCI) atau pendekatan lain," katanya.

Muhyiddin berkata demikian ketika berucap pada majlis perasmian persidangan perwakilan tiga tahun sekali ke 13 Pertubuhan Pasok Momogun Kadazandusun Murut Bersatu (Upko) di Pusat Kebudayaan Penampang, di sini.

Katanya kerajaan akan menunggu laporan jawatankuasa tersebut dan tampil dengan cadangan dengan mengambil kira semua faktor yang telah diteliti.

Beliau, yang mengulas cadangan penubuhan RCI yang disentuh dalam ucapan dasar presiden Upko Tan Sri Bernard Dompok, berkata masalah PATI perlu ditangani kerana ia sudah berlarutan sekian lama.

"Saya tahu soal isu PATI waktu saya mengambil alih sebagai peneraju dalam Jawatankuasa Kabinet. Kita bincang bagaimana mahu menyelesaikan PATI yang baru dan PATI lama.

"Ini satu masalah besar dan walaupun kita sudah mula proses yang kita sebut 6P di semenanjung dan 5P di Sabah, saya lihat belum lagi boleh dikatakan kita sudah selesai," katanya.

Muhyiddin juga berkata kerajaan BN pimpinan Datuk Seri Najib Tun Razak telah memperkenalkan langkah-langkah luar biasa yang mengubah lanskap politik negara termasuk pemansuhan Akta Keselamatan Dalam Negeri (ISA) dan Ordinan Darurat dan pindaan-pindaan akta yang signifikan.

Katanya kesediaan kerajaan membuat pindaan ke atas akta-akta itu bukan sesuatu yang biasa tetapi menunjukkan satu sifat kepimpinan telus dan bersedia untuk menerima dan membawa perubahan.

Muhyiddin turut meminta anggota BN termasuk Upko supaya bersiap sedia menghadapi pilihan raya akan datang yang menurutnya amat penting bagi menentukan kelangsungan BN.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=615561>